

**INKULUMO KANGQONGQOSHE WEZOKUTHUTHA, UKUPHEPHA
NOKUXHUMANISA UMPHAKATHI KWAZULU-NATAL UMNUS WILLIES
MCHUNU EMCIMBINI WOKUVULWA KWEBHULOHO IWELA OLUNDI
MHLAKA 28 JANUARY 2014.**

Inkosi yesizwe saKwaMlaba;

Amakhosi aseNdlunkulu akhona;

ONgqongqoshe abakhona;

Amalungu esiShayamthetho;

IziMeya

Amakhansela;

Abasebenzi beminyango yonke ekhona;

Amalungu ezinhlelo esisebenzisana nazo kwezokuthutha ama-RRTF, ama-
CRSC, ama-PTPA, uVukuzakhe noZibambeke;

Abezindaba;

Umphakathi wonke ngiyani bingelela.

Kuyintokozo ukuthi siphinde sibuye sizohlangana nomphakathi walapha
oLundi naseZululand sizowubongela sithi halala ngentuthuko eqhubekayo
kule ngxenye yesifundazwe.

Kodwa futhi usuku lwanamhlanje ngelokuthi sizobonga kinina mphakathi
ngokubambisana noHulumeni nivume ukuthi kungene izinhlelo zentuthuko
endaweni yenu.

Namhlanje sikhuluma ngokubambisana kwethu nani ngoba yikona phela okwenza ufezeke kalula umgomo wethu wokuthi sibe nguHulumeni ongagcini nje ngokukhuluma kodwa owenzayo – ohlale ukufeza lokho ozibophezele kukona.

Akusadingi silokhu sigcizelela manje ukuthi amabhuloho nemigwaqo yikona okuyisisekelo sokwenza ngcono impilo yabantu bakithi. Lokhu kubonakala nangokuthi emiphakathini lapho sekulethwe khona le ngqalasizinda, abantu babonga bangaphezi ngokuthi isifundazwe sesinoHulumeni okwazi ukuphendula ezidingweni zabantu.

Lapha esifundeni saseZululand jikelele sesibone kaningi ukuthuthukiswa kwemigwaqo nosekwenze ngcono impilo kubantu abaningi. Imiphakathi eminingi ezindaweni zaseZululand manje ijabulela ukufinyelela ezindaweni lapho abantu abahlala emadolobheni nasemalokishini bekuthatha kalula nje ngoba bazalwa ikhona ingqalasizinda.

Bathi babona uHulumeni owaziyo ukuthi uma izimali zingafinyeleli emiphakathini emazingeni aphantsi zenze umehluko ezimpilweni zabantu abampofu – abayiningi lezakhamizi nabavoti bawo – kuyobe njengoHulumeni sehlulekile emsebenzini esithunywe wona ngabantu balesi sifundazwe.

Kafushane nje engiqonde ukukusho lapha ngukuthi baningi ohulumeni asebakika badlula ezweni lethu, kodwa kuyaqala emlandweni wesifundazwe sethu ukuthi sibone izimpilo zabantu ziba ngcono ngalolu hlobo.

Umgwaqo nebhuloho yizinto eziyigugu ngendlela eyisimanga kumuntu ongakaze ezwe ukuba lula kwempilo uma unako. Lapha-ke niyazi nonke ukuthi sisho ukuthini ngalokhu ngoba senike nakuzwa ukushaywa indiva iminyaka engekho oninakile.

Niyazi ukuthi manje seniyakwazi ukuya emsebenzini, ezikoleni, ezitolo edolobheni, emitholampilo, ukuyongcwaba emathuneni noma nivakashele izihlobo nabangani, ngoba uHulumeni wenu usenenzele kwaba lula lokho ngokwakha ingqalasizinda yamabhriji endaweni yenu.

Siyazi ukuthi lokhu kusho ukuthini kinina futhi siyajabula ukuthi nikwazile ukukhetha uHulumeni oqonda futhi anake izidingo zenu.

Esiyaye sikuthande futhi sikubonge kakhulu njengoHulumeni emiphakathini yakithi yindlela enisibekezelela ngayo. Siyazi phela ukuthi ngenxa yobukhulu besifundazwe nezindawo eziningi zasemakhaya ezisasilele emuva ngengqalasizinda yomgwaqo, kuyenzeka eminye imisebenzi ithathe isikhathi eside ukuba siyiqale emiphakathini yethu.

Sesiwabonile futhi namathuba emisebenzi eya ngokwanda kulezo zindawo okwenziwa khona imisebenzi yengqala-sizinda yomgwaqo.

Kunenqwaba yosonkontileka abasafufusa abahlomulayo. Ezinye izinkampani zokwakha seziqashe abantu ngokuphelele ngenxa yokuzinikela kwabo emsebenzini wabo nokuyinto esizigqajayo ngayo ukuthi niwathathela phezulu amathuba aqhamuka noHulumeni enamkhethayo.

Namhlanje-ke sithi singumNyango wezokuThutha egameni likaHulumeni waKwaZulu-Natal sidlulisela ngokusemthethweni ibhuloho lomfula iWela elidle isamba sika-R9.6 million.

Ngakho-ke sithatha leli thuba sithi siyawubongela umphakathi ikakhulukazi waKwaZungu okuyiwona osuhlomule kakhulu lapha. Lapha kuzosizakala nabantu abaya eWela Clinic nabafundi abaya ezikoleni iTshendlovu Primary neMhawukelwa Primary.

Ngaphandle kwalo msebenzi esiwudlulisa ngokomthetho namhlanje, ikhona neminye imisebenzi eminingi okungashona ilanga uma siyibala esiyenzile kule minyaka yezimali emibili edlule kule ngxenye yasoLundi ngaphansi kweZululand.

Ngaphansi kohlelo lomNyango lokwakha imigwaqo engenela emiphakathini, esithi ama-access road, kule minyaka emibili edlule nje sekwazile ukwakha imigwaqo okubalwa kuyona uNdelu noDansa Local Road KwaPhindangene, iMphothi uMaqiyana, uMahlabathini, uSishwili, uNtendeka Local Road yonke eseNkosini yaKwaMpungose.

Kukhona nemigwaqo eya ezikoleni iMahlabathini neThengisangaye khona futhi eNkosini yaKwaMpungose.

ENkosini yaKwaNdebele sakhe uNdebele Local Road noPhikwase Local Road.

Kulonyaka kuneminye futhi imigwaqo esesihlele ukuyakha okukhona kuyona uMbudle noZishozini eNkosini yaKwaMbatha, uNdlovana KwaMpungose, uQokamandla noZikhumbeni KwaXaba noMlaba, uVuthela eNkosini yaKwaZungu noMalangana Local Road eNkosini uZulu eMathongeni.

UmNyango wezokuThutha-ke sewaba nohlelo lokwaba imali ngokwezifunda zonke ukuze siqinisekise ukuthi akekho osala ngemuva. Lapha eZululand nje kulo nyaka esiwuqalayo sihlele ukufaka imali engu-R337 million ezobhekelela yonke imisebenzi yengqalasizinda yezokuthutha.

Kule misebenzi kunamathuba emisebenzi abalelwa ngaphezulu kuka-400 azodaleka kubantu bendawo. Ngaphezulu kwalokho kuzobakhona osonkontileka bakaZibambele ababalelwa ku-360 abazothola amathuba okuqashwa.

Ngaphambi kokuthi ngiphethe, ake ngithathe leli thuba ngigcizelele ukuthi njengoba sazi ukuthi lona ngunyaka wokhetho lukazwelonke nezifundazwe, sinxusa yonke imiphakathi ukuba ihloniphe umthetho ngesikhathi sokhetho.

Ukuzibophezela emgomweni wokuziphatha okwenziwa ngamaqembu ethu epolitiki njalo ngesikhathi sokhetho, kumele sikubone kuthela izithelo emazingeni aphansi.

Siyagcizelela ukuthi makangabi khona umuntu ophoqa noma asabise omunye noma amphoqe ukuba aqoke iqembu elithile ngenkani ngesikhathi sokhetho.

Okumele nikuqaphele ngukuthi uma kukhona umuntu oniqhathayo odala ukuba nilwe anokwazi ukuthi lowo muntu yisigilamkhuba okumele nisibike kwabomthetho. Umuntu owenza loko kusho ukuthi akayifuni inqubekela phambili, futhi ulwisana nentando yeningi, ngakho kumele abhekane nabomthetho.

Ngalawo mazwi ngithi masibambisane sakhe isizwe esikhululekile ndawonye.

Ngiyabonga